

AKASHVANI AIZAWL  
REGIONAL NEWS BULLETIN  
(MIDDAY)



NABARD

National Bank for Agriculture and Rural Development (NABARD) din ni (Foundation Day) vawi 44-na pualin nimin khan Lunglei District-a Mausen khuaah NABARD hnuaia hma lakna hrang hrang puanzarna hun buatsaih ani a thing phun a ni bawk.

NABARD Foundation Day puala hun hmanah hian NABARD Lunglei District Development Manager Pi Chiinngaihkim Phiamphu leh Mizoram Cooperative Apex Bank Lunglei AG-I Pu H. Remsangpuia te bakah, Lushai Agriculture Producer Company Ltd-a Board of Directors leh FPO member-te an tel a. Pi Chiinngaihkim Phiamphu chuan NABARD kal tlanga Lunglei District chhunga hmasawna hna thawh hrang hrang leh mipuite'n an chhawr dante a tarlang a. Haulawng, Vahnne leh Sairepa lui kam humhalhna tur springshed development project-te, thingtlang mite tihhmasawna tur tribal development project hnuaia hma lakna hrang hrang te, chawhmeh bazar (rural haat) leh vantlang dawr (gram dukan) sak te, thiam thil inzirtirna (skill development programme) leh sumdawn dan inzirtirna (micro-entrepreneurship development programme) buatsaih te chu Lunglei District-a hma lakna lian zual a nih thu a tar lang bawk.

Pu H. Remsangpuia'n Primary Agricultural Credit Societies (PACS) te hnena an bank kal tlanga tanpuina pek a nih dan leh kut hna thawktute'n M-PACS kal tlanga sum an puk atanga sumdawnna bul an tan theih dan te a tar lang bawk ani a.

Hemi hnu hian Ministry of Environment, Forest and Climate Change hnuaia ramngaw siam belhna tura hma lakna, "Ek Ped Maa Ke Naam" pualin Mausen khuaah hian thing tiak eng emaw zat phun a ni.

NABARD hi July ni 12, 1982 khan din niin, India rama agriculture leh thingtlang hmasawna atana hma latu lian ber pakhat a ni a. Kumina Foundation Day lawmna hi July 12 - 19 inkar chhungin kawng hrang hrangin buatsaih a ni.



**RED CROSS**

Indian Red Cross Society (IRCS) Mizoram State Branch chuan nimin khan an Managing Committee Chairman Pu H. Lalengmawia hovin, Home pathum (3)-ah tanpuina an hlan.

IRCS Mizoram State Branch hian , Grace Home Durtlang-ah Oxygen Concentrator 5 an pek bakah Hmangaihna In Durtlang leh Hermon Childrens’ Home Durtlang-ah Blanket- 30 ve ve an pe a,Pu H. Lalengmawia chuan, Indian Red Cross Society chu tanpui ngaite tanpuitu a nih angin tanpuina hi pechhuak an nih thu a sawi a. Ramin harsatna a tawh palha tanpuina hna thawk thei tura thalaite buatsaih chu Red Cross thiltum a nih bawk avangin, College hrang hrangah training an pek mek thu leh, IRCS Mizoram State Branch hi an tuai thar leh mek thu a sawi a ni.

Indian Red Cross Society (IRCS) Mizoram State Branch hi hun rei tak mumal lo taka a awm hnuah, tuai thar leh mek a ni a. larsap Gen. VK Singh chu State President a ni mek a ni.



**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



**TCZP**

Tuichangral Zirlai Pawl (TCZP) chuan nimin khan Aizawl-ah Fresher Social leh kum 2024-2025 academic year a zirlai tiṭha te lawmpuina hun an hman.

He hun hmanpuitu Minister Pu PC Vanlalruata chuan mi harh vang tak nih a pawimawh thu sawiin, zirlaite chu an zirlai piah lamah lehkhahu chhiar tam leh turin a fuih a. Co-operative movement-ah rilru sen tlan a ngaih thu sawiin, industry a thawh tur lam emaw eizawna dang zawnga ṭhalai ten luhchilhin, hna nei lo te tana hna neihna a nih avangin Co-operative lam ngaihven turin Zirlai kalkhawm te chu a fuih a ni.

Adviser to CM (Political) Pu Lalmuanpuia Punte pawhin thu sawiin zirlai pawl chu hnam hrang hrang leh mize hrang hrang awm khawmna a ni a, zirlai pawl chu hnam phuar khawmtu ani a ti a, Lehkha thiam degree sang nei chuan Mizoram chung ringawta hna zawng lo a, state danga hna zawn intihhmuh a that thu sawiin, bial chung tan Skill development neih theihna tur a nih chuan MLA Fund atanga siam a inhuam thu a sawi bawk a ni.

TCZP huam chhûng khaw chhuak atanga kum 2025 MCS Topper Pu Samuel Malsawmzuala leh MCS Pu Lalrinhlua te pawhin thu an sawi ani.



SERKHAN-BAGHA ROAD

Kolasib District Disaster Management Authority Chairman Kolasib district bawrhsap ni bawk Pu Robert C Lalhmangaiha chuan Serkhan leh Bagha inkar kawnga Bukpui leh Thingthelh inkar leh Thingthelh leh N Hlimen inkarah leimin avanga kawng a tlakbal avangin kawng hi a chhiat zel loh nan leh lirthei veivakte him zawkna atan Serkhan leh Saipum inkarah lirthei LMV leh a huai lam chauh kal phal a nih thu hriattirna a chhuah a. Lirthei lian kal phal a ni lo. He thupek zawm lo chu Disaster Management Act, 2005 angin hrem theih an ni ang.



PARLIAMENT MONSOON SESSION

Parliament fur thutkhawm chu naktukah tan a ni dawn a, thla leh Aug ni 21 thleng a awh ang. Session chhung hian rorel inkhawm vawi 21 nei tura duan a ni. Parliamentary Affairs Minister Kiren Rijiju-a’n thuthar lakhawmtute a hrilh danin, sorkar chu Parliament-a thu pawimawh hrang hrang chhawh chhuahte sawiho turin a inpeih a ni, a ti a, Jan Vishwas (Amendment of Provisions) Bill 2025 bakah National Sports Governance Bill 2025 leh Merchant Shipping Bill 2024-te chu ngaihtuahho tura put luh rin a nih thu a sawi bawk.

